

# JAVNA I KULTURNA DJELATNOST ŠKOLE

Leila Klapić - nova hafiza Behram-begove medrese

U četvrtak, 19. 9. 2019. godine u prepunoj džamiji Behram-begove medrese proučena je hafiska dova bivšoj učenici naše škole Leili Klapić. Ona je 66. hafiz/a koju je iznjedrila naša škola. Ona je hifz položila u rekordnom vremenu, za samo sedam dana, u periodu od 17. do 23. juna 2019. godine pred Komisijom za polaganje hifza Rijasetu Islamske zajednice u Bosni i Hercegovini. Muhafiz je bio hafiz Abdullah Kapo, odgajatelj u Behram-begovoj medresi, kojem je ovo drugi kandidat kojeg je izveo u zvanje hafiza časnog Kurana. Na svečanosti su se obratili direktor Behram-begove medrese Ahmed Hatunić, izaslanik reisul-uleme Islamske zajednice u Bosni i Hercegovini hafiz Abdulaziz Drkić, viši asistent na FIN-u, te izaslanik muftije tuzlanskog Sead Seljubac. Diplomom hafiza Kur'ana mladoj hafizi je uručio izaslanik reisul-uleme hafiz Abdulaziz Drkić. Među prisutnima su bili profesori, imami, bivše učenice, sadašnji učenici Medrese, mnogobrojna rodbina i prijatelji. Dovu je proučio muhafiz Abdullah Kapo. Hafiza Leila Klapić je rođena 1998. godine u Tuzli. Prva je hafiza sa područja Priluka. Sada je angažirana u Medresi kao noćna odgajateljica i studira na Farmaceutskom fakultetu u Tuzli.

## Učenici medrese čistili svoj grad

U Tuzli je u petak 20. septembra realizovana i osma terenska akcija čišćenja ilegalnih deponija otpada "Let's Do It – Očistimo zemlju za jedan dan". U ovoj ekološkoj aktivnosti učestvovali su i učenici Behram-begove medrese koji pohađaju Ekološko-botaničku sekciju. Više od 1.000 učenika tuzlanskih osnovnih i srednjih škola uklanjalo je otpad sa nekoliko gradskih izletišta. Akciju čišćenja gradskih izletišta organizovalo je Udruženje građana "Multi".

## Edukativno putovanje najuspješnijih učenika

U organizaciji Vjersko-prosvjetne službe Rijaseta Islamske zajednice u Bosni i Hercegovini u periodu od 20. do 23. septembra 2019. godine realizovano je edukativno nagradno putovanje za učenike medresa koji su u prošloj školskoj godini ostvarili najbolje rezultate. Prilikom ovog putovanja učenici su posjetili Novi Pazar, Skoplje, Tiranu, Podgoricu i Dubrovnik. Iz Behram-begove medrese na ovo putovanje je išlo jedanaest učenika u pratnji Dine Ćorovića, profesora fizike u našoj školi. Prilikom posjete ovim gradovima učenici su posjetili medrese, fakultete, džamije i druge znamenitosti, a imali su priliku da se upoznaju sa historijskim i kulturnim naslijeđem naroda koji žive na ovom prostoru.

## Vojni imami i svećenici u posjeti našoj školi

Našu školu je u utorak 24. 9. 2019. godine posjetilo pedeset vojnih imama i kapelana iz 13 zemalja svijeta. Oni su svoju posjetu Muftijstvu tuzlanskom iskoristili i za posjetu i obilazak kompleksa Behram-begove medrese. Direktor Medrese Ahmed Hatunić zahvalio se gostima na posjeti i upoznao ih je sa radom naše škole. O historijatu Islamske zajednice u Bosni i Hercegovini i njenom ustrojstvu govorio je muftija tuzlanski Vahid-ef. Fazlović. Za njih je pripremljen i poseban program dobrodošlice, koji su izveli članovi Recitatorske sekcije i Hora.

## Održan zajednički roditeljski sastanak

U džamiji Behram-begove medrese u subotu, 28. septembra ove godione održan je opći roditeljski sastanak za roditelje učenika svih odjeljenja. Direktor Behram-begove medrese Ahmed Hatunić

obratio se roditeljima i zaželio sretan početak i uspješnu školsku godinu svim učenicima. Potom su održani roditeljski sastanci u svakom odjeljenju. Na ovim sastancima roditelji su upoznati s bitnim informacijama vezanim za nastavni proces i život u internatu koji očekuje njihovu djecu u toku ove školske godine.

### Treći razred u posjeti Potočarima i Veljacima

Posjeta Memorijalnom centru Potočari realizovana je u srijedu 2. oktobra 2019. godine. Ovo je redovna posjeta učenika trećeg razreda naše škole Memorijalnom centru Srebrenica-Potočari. Ovom prilikom učenici su prisustvovali historijskom času, na kome su mogli čuti osnovne činjenice o početku agresije na Srebrenicu, o ulozi Unprofora u ovoj zaštićenoj zoni u vrijeme agresije i o događajima koji su se prethodili 11. julu i načinu na koji je izvršeno ubistvo civila koje je trajalo nekoliko dana. Također su posjetili i savremeno opremljen muzej u bivšem glavnom štabu holandskog bataljona Unprofora. Muzej je sačinjen od multimedijalne sobe, a pored nje je u nekoliko soba smješten Muzej genocida, napravljen u saradnji sa vlastima iz Holandije. Mogli su vidjeti život u slikama Srebreničana prije agresije, kao i u toku rata, dokumente i videozapise iz rata. Prvi puta su učenici naše škole na putu za Srebrenicu posjetili i Memorijalni centar Veljaci u Bratuncu. Saznali su da je ovo zadnje počivalište civilnih žrtava rata koje su ubijene na početku agresije u maju i junu 1992. godine. Najveći broj ubijenih su bili djeca, žene i starci. Do sada je na ovom mezarju ukopana 301 civilna žrtva iz proteklog rata.

### Program dobrodošlice za prvi razred

U ponedjeljak, 30. 9. 2019. godine učenice drugog razreda su realizirale Program dobrodošlice za učenice prvog razreda. Program se sastojao od ilahija, pjesama, skečeva... Učenice prvog razreda su prozване i uručeni su im prigodni pokloni. Program dobrodošlice učenicama prvog razreda je tradicionalan i izvodi se još od prvih godina rada Medrese u obnovljenom periodu. Programu su prisustvovalе učenice sva četiri razreda Medrese, kao i profesorice.

## Susreti mladih novinara

Konferencija redakcija školskih listova srednjoškolskih ustanova Islamske zajednice u Bosni i Hercegovini održana je u petak i subotu, 4. i 5. oktobra tekuće godine u Behram-begovoj medresi. Konferenciju je otvorio direktor naše škole Ahmed Hatunić, a otvaranju je prisustvovao i Seid Eminović, direktor Uprave za obrazovanje i nauku Rijaseta Islamske zajednice u Bosni Hercegovini. Učesnici Konferencije u prvom dijelu druženja predstavili su svoje školske listove: Prva bošnjačka gimnazija iz Sarajeva predstavila je list *Vrelo*, Elči-Ibrahim pašina medresa iz Travnik list *Nedžm*, Gazi Husrevbegova medresa svoj *Zemzem*, Karadžoz-begova medresa iz Mostara školski list *Mimar*, Medresa "Osman-ef. Redžović" iz Visokog list *Šahid* i naša škola list *Misak*. U ovom dijelu programa od naše redakcije predložen je i izlazak zajedničkog školskog lista svih medresa i gimnazija, za koji bi pisali urednici. Predavači na konferenciji su bili Kasim Softić, glavni i odgovorni urednik Radio-televizije Tuzlanskog kantona i Almasa Hadžić, novinarka *Dnevnog avaza*. Kasim Softić se u svom predavanju dotakao tema koje se odnose na javne medije i njihov način funkcionisanja, a novinarka Hadžić je pričala o svom novinarskom putu, dotičući se perioda agresije na našu zemlju, njenih prvih izvještaja sa borbenih linija, spominjući neka značajna imena koja je tom prilikom srela i sa kojima je ostala sve do sada u kontaktu, kao što je poznanstvo sa novinarom Roy Gutmanom, te njeno prvo izvještavanje sa mjesta pronalaska masovne grobnice kod Zvornika. Susreti mladih novinara trebali bi postati lijepa tradicija, a sljedeći susret zakazan je za godinu dana u nekoj od naših medresa ili gimnazija.

## Uspostaviti mrežu vijeća učenika IZ u BiH

Behram-begova medresa je 4. i 5. oktobra ove godine bila domaćin susreta vijeća učenika srednjoškolskih obrazovnih ustanova Rijaseta Islamske zajednice u Bosni i Hercegovini. Skupu su prisustvovali učenici iz bosanskih medresa, Islamske gimnazije dr. Ahmed Smajlović iz Zagreba i Prve bošnjačke gimnazije iz Sarajeva. Na ceremoniji otvaranja obratili su se direktor naše škole Ahmed Hatunić i Seid Eminović iz Uprave za obrazovanje i nauku RIZ-a. Program se sastojao od prezentacije aktivnosti vijeća učenika, a razgovaralo se i potrebi organiziranja mreža vijeća učenika IZ u BiH, njenom

ustrojstvu i organizaciji. O ovoj temi je govorila predsjednica Vijeća učenika Behram-begove medrese Melika Smajić.

### Obilježen Dan vakifa Behram-begove medrese

Da je ideja ostavljanja dobra za općeobrazovne svrhe mnogima prirasla srcu, govori i podatak da je ovaj dan obilježen u društvu mnogobrojnih gostiju i prijatelja naše škole i da je sve veći broj vakifa koji su spremni izdvojiti svoja sredstva. O uspjesima naše škole, te o projektima koji su realizirani govorio je direktor Behram-begove medrese Ahmed Hatunić. U ime Rijaseta Islamske zajednice u Bosni i Hercegovini obratio se Seid Eminović iz Uprave za obrazovanje i nauku. Muftija tuzlanski Vahid-ef. Fazlović u svom obraćanju je istakao važnost vakufa i dobročinstva. I ove godine na manifestaciji su uručene vakufname novim vakifima Beram-begove medrese, kao simbolična potvrda njihovog velikog i trajnog dobročinstva. Dan vakifa Behram-begove medrese obilježen je u subotu, 5. 10. 2019. godine.

### Najbolji u prošloj školskoj godini nagrađeni za Dan škole

U utorak, 8. oktobra ove godine nizom programa obilježen je Dan Behram-begove medrese u Tuzli. U džamiji je izveden svečani program, koji su izveli učenici naše škole. Tom prilikom su proglašena odjeljenja koja su u prošloj školskoj godini ostvarila najbolji uspjeh, kao i učenici koji su bili najbolji u svojim odjeljenjima. Najbolja odjeljenja su: IIIId s prosječnom ocjenom 4, 48, IIIc s prosječnom ocjenom 4, 46 i Ic s prosječnom ocjenom 4, 31. Odjeljenje s najmanje izostanaka u protekloj školskoj godini je IIIId. Najboljim učenicima u prošloj školskoj godini proglašeni su: Faris Keserović Ia, Ahmed Mešanović Ib, Amina Fajić Ic, Sumeja Muratović Id, Harun Bečić IIa, Ismail Brkić IIb, Selma Džafić IIc, Azra Fazila Agić IID, Dino Selimović IIIa, Zejd Špijodić IIIb, Enida Fatić IIIc i Merjem Skula IIIId. Također su proglašeni pobjednici literarnog konkursa koji je objavila Medresa: Melika Smajić je osvojila prvo mjesto, Harun Bečić je drugo, a Amel Tokalić treće mjesto. Najaktivniji čitalac u prošloj školskoj godini je Harun Bečić, a za najboljeg sportistu proglašen je Hajrudin Vejzović. Ovogodišnji dobitnici priznanja za Dan škole su profesori Rijad Šestan i Asmir Dorić. Iz tehničkog osoblja ovogodišnje priznanje dobila je Mevlija Požegić. Direktor Behram-begove medrese

Ahmed Hatunić uputio je čestitku svim učenicima i profesorima za ostvarene rezultate u protekloj godini, a posebne čestitke je uputio dobitnicima priznanja.

### Saradnja sa Katoličkim školskim centrom

Članovi Ekološko-botaničke sekcije su u ponedjeljak, 14. oktobra učestvovali u obilježavanju Dana kruha, u organizaciji Katoličkog školskog centra u Tuzli. Naše učenice su povodom ovog značajnog dana za katolike učestvovala na tribini "Žitarice svakodnevno - šta odabrati". A pripremile su predavanje na temu "Značaj korištenja raznovrsnih žitarica u ishrani". Inače, članovi Ekološko-botaničke sekcije svake godine učestvuju na tribini koju organizuje Katolički školski centar.

### Dan roze mahrame

I ove godine je 30.oktobar u našoj školi prošao u znaku podrške ženama koje su oboljele od karcinoma. Sve učenice medrese su na nastavi nosile roze mahrame. Na ovaj način pridružile su se ženama širom svijeta koje se solidariziraju s oboljelima od ove opake bolesti.

Širom svijeta u oktobru muslimanke učestvuju u ovoj kampanji, organizirajući različite aktivnosti, okrugle stolove i tribine, a jedini cilj je da se podigne svijest o rasprostranjenosti ove bolesti. Dan roze mahrame počeo se obilježavati 2004. godine u SAD-u, a vremenom se proširio na Južnu Afriku, Egipat, Katar i druge zemlje.

### Zaživio projekat Partnerstvo medresa

Naša škola je u periodu od 28. 10. do 1. 11. prvi put učestvovala u projektu Partnerstvo medresa. Partnerska medresa naše škole bila je Elči Ibrahim-pašina medresa iz Travnika. Deset učenika drugog razreda Elči Ibrahim-pašine medrese u navedenom periodu prisustvovalo je nastavnim i vannastavnim aktivnostima u našoj školi. Dok su boravili u Medresi, imali su priliku posjetiti kulturno-historijske znamenitosti ovog kraja: obišli su grad Tuzlu, posjetili stari grad Srebrenik, Gradačac i Bosanski Šamac. U sklopu vannastavnih aktivnosti prisustvovali su i AVP-radionicama. Grupa učenika drugog razreda bila je zadužena da se druži sa gostima iz travničke medrese, kako bi se brže i lakše prilagodili životu u našem internatu.

Pozitivna iskustva koja su ponijeli iz naše škole dobar su pokazatelj da ovaj projekat treba da preraste u tradiciju .

### Edukacija o oralnoj higijeni i zaraznim bolestima

U prvoj sedmici novembra za učenike prvog razreda naše škole realizovani su edukacijski programi koji se već tradicionalno u Medresi organizuju nekoliko godina. Predstavnici stomatološke službe Doma zdravlja iz Tuzle su u ponedjeljak, 4. novembra održali predavanje o oralnoj higijeni. Stručnjaci koji su se obratili učenicima su dr. Mirjana Duspara, načelnica ovog odjeljenja, dr. Admir Brkičević, specijalista oralne medicine i parodontologije, i Vesna Begić, glavna sestra. Nakon edukativnog predavanja organiziran je sistematski stomatološki pregled za učenike prvog razreda u Domu zdravlja Tuzla. Također su naši učenici prisustvovali edukativnim predavanjima o zaraznim bolestima, njihovom širenju i prevenciji. Ova predavanja su održale dr. Jasna Šadić i dr. Amerlina Mehičić iz Higijensko-epidemiološke službe Doma zdravlja Tuzla. Ova predavanja bi trebala da kod učenika razviju svijest o načinima prevencije širenja zaraznih bolesti.

### Proučen mevlud u Behram-begovoj medresi

U utorak, 12. 11. 2019. godine u Medresi je proučen tradicionalni mevlud povodom rođenja poslanika Muhammeda, a.s. Program je izveo hor Medrese. U ovoj svečanoj prilici obraćanja su imali direktor Behram-begove medrese Ahmed Hatunić i bivši direktor Gazi Husrev-begove medrese u Sarajevu profesor Zijad Ljevaković. Gosti na ovogodišnjem mevludu bili su učenici Medicinske škole iz Tuzle i Gimnazije "Ismet Mujezinović" iz Tuzle sa svojim vjeroučiteljima.

### Izložba, mevlud i druženje

Tradicionalni mevlud za žene izveden je u četvrtak, 14. 11. 2019. godine u džamiji Behram-begove medrese. Program se sastojao od učenja mevluda i izvođenja ilahija. Prisutnima su se obratile Merzija Kasumović, profesorica ahlaka u Behram-begovoj medresi, i Hasiba Saračević, koordinatorica Odjela za brak i porodicu Muftijstva tuzlanskog. U okviru manifestacije organizirana je prodajna izložba likovnih radova, ručnih radova i kolača, a prikupljeni novac će biti upotrijebljen u humanitarne svrhe. I ove godine mevludu su

prisustvovala udruženja žena s područja medžlisa Islamske zajednice Gradačac, Lukavac, Janja i Bosanski Šamac.

### Održani Drugi susreti mladih matematičara i fizičara

U subotu i nedjelju, 15. i 16. 11. 2019. godine Behram-begova medresa je bila domaćin Drugih susreta mladih matematičara i fizičara medresa i gimnazija Islamske zajednice u Bosni i Hercegovini. Na otvaranju susreta prisutnima se obratio direktor naše medrese Ahmed Hatunić. On je istakao značaj prirodnih nauka u razvoju logike kod učenika i njihov doprinos koji imaju u razvoju i napretku jednog društva. Tokom susreta učesnicima su održali interesantna predavanja profesori s Prirodno-matematičkog fakulteta Univerziteta u Tuzli: dr. Amra Rekić-Vuković, dr. Smajo Sulejmanović, dr. Hedim Osmanović, mr. Jasmina Muminović-Huremović, te mr. Dino Ćorović, profesor fizike u Behram-begovoj medresi. Učenici Dino Selimović i Enida Fatić su izveli eksperiment s radioaktivnim zračenjem.

Učesnici susreta su imali i edukativnu posjetu Termoelektrani Tuzla. U pratnji inženjera Osmana Jusufovića učenici i profesori su obišli kompleks Termoelektrane i detaljno se upoznali sa etapama u procesu proizvodnje električne energije, od dopremanja uglja iz rudnika do finalne isporuke električne energije potrošačima. Susretima je u završnici prisustvovao i Seid Eminović iz Uprave za obrazovanje i nauku Rijaseta Islamske zajednice u Bosni i Hercegovini.

### Radionice srednjoškolaca o Poslaniku

U našoj školi u srijedu, 20. 11. 2019. godine održane su radionice tuzlanskih srednjoškolaca o poslaniku islama Muhammedu, a.s. Ovo je već peta godina kako se organizira ovo druženje. Učestvovalo je šest škola sa po četiri učenika: Gimnazija "Meša Selimović", Gimnazija "Ismet Mujezinović", Medicinska škola, Mješovita srednja saobraćajna škola, Srednja ekonomsko-trgovinska škola, Građevinsko-geodetska škola i Behram-begova medresa. Teme o kojima su srednjoškolci razgovarali su Muhammed, a.s., kao porodični čovjek, tolerancija i suživot u misiji Muhammeda, a.s., poslanik kao lider i državnik i kao savršen uzor u vjeri i moralu. Izveden je i kraći kulturni program u realizaciji hora Behram-begove medrese.



## Medresa na Sajmu zanimanja srednjih škola

Članovi Vijeća učenika Behram-begove medrese iz četvrtog razreda su u srijedu 20. novembra predstavili Behram-begovu medresu na Sajmu zanimanja srednjih škola. Sajam je organiziralo Udruženje za socijalni, kulturni i kreativni razvoj "Zora" Zenica, Grad Tuzla i Ministarstvo obrazovanja i nauke Tuzlanskog kantona. Ovo je treći sajam po redu i održan je u "Mejdanu".

## Domovini s ljubavlju

U našoj medresi je Dan državnosti Bosne i Hercegovine obilježen u četvrtak 28. novembra 2019. godine. Program su pripremili učenici i učenice trećeg razreda naše škole. Po prvi put u medresi je gostovao i hor osnovne škole "Novi Grad". Naši učenici su izveli recitacije, kraći dramski prikaz o ZAVNOBiH-u, sevdalinke, a hor Behram-begove medrese izveo je ilahiju. Učenicima se obratio direktor Behram-begove medrese Ahmed Hatunić, a predavanje je održao profesor historije u Medresi Idriz Memić.

Na programu su dodijeljene i nagrade učenicima koji su učestvovali na konkursu za najbolju digitalnu fotografiju, a koji je raspisala naša škola. Ovogodišnja tema bila je "Preko brda i planina / u ravnici moja domovina". Nagrade za najbolju fotografiju dodijeljene su Ahmedu Hrnjiću, učeniku četvrtog razreda naše škole, koji je osvojio prvo mjesto, drugo mjesto osvojila je Kerima Spahić, učenica trećeg razreda, a treće mjesto osvojila je Elma Polutak, učenica drugog razreda.

## Večer Kur'ana trećeg razreda

U četvrtak, 21. 11. 2019. godine održana je Večer Kur'ana za učenike i učenice trećeg razreda. Sve aktivnosti oko organizacije i realizacije pripremili su učenici i učenice. U programu je učestvovalo šest učesnika: 3 učenika i 3 učenice. Predavanje je održao Husein Zulić, učenik IIIa, a tema je bila "Vrijednosti učenja Kur'ana". Ova aktivnost je prvi put realizirana ove godine, a planirano je da se svaki mjesec u narednom periodu organizira zajednička aktivnost jedne generacije učenika.

## Dan volontera obilježen prodajnom izložbom

U Behram-begovoj medresi u Tuzli je u četvrtak, 5. decembra obilježen Svjetski dan volontera. Volonteri već nekoliko godina zaredom obilježavaju ovaj dan, pripremaju kolače i razne poslastice, koje onda prodaju svojim profesorima i kolegama u školi. Ove godine pripremili su i slanu ponudu, te različite rukotvorine i suvenire. Tako oni, uporedo sa svojim volonterskim satima, obezbjeđuju i materijalna sredstva za svoje humanitarne aktivnosti. Međunarodni dan volontera proglasila je Generalna skupština Ujedinjenih naroda 17. decembra 1985. godine. Od tada se svake godine 5. decembar obilježava kao Međunarodni dan dobrovoljnog rada za ekonomski i društveni napredak društva.

## Dodjela nagrada

U Mostaru je u petak, 6. 12. 2019. godine održana svečanost dodjele nagrada najboljim učenicima osnovnih i srednjih škola u Federaciji Bosne i Hercegovine za školsku 2018/2019. godinu. Po tri učenika osnovnih i srednjih škola iz svakog kantona nominirala su kantonalna ministarstva obrazovanja. Tako je na svečanosti u Mostaru nagrađeno ukupno 60 osnovnoškolaca i srednjoškolca iz svih kantona u Federaciji Bosne i Hercegovine, a priznanja su uručena i školama koje pohađaju nagrađeni učenici, i to za 58 osnovnih i srednjih škola u Federaciji Bosne i Hercegovine. Među tri nagrađena srednjoškolca iz Tuzlanskog kantona našla su se dva učenika Behram-begove medrese: Enida Fatić i Tarik Britvarević. U školskoj 2018/2019. godini Enida Fatić je, između ostalih uspjeha, osvojila prvo mjesto na 24. federalnom takmičenju iz fizike, dok je Tarik Britvarević na istom takmičenju osvojio drugo mjesto i bio učenik generacije naše škole. Priznanje Behram-begovoj medresi za prepoznavanje, podsticanje i usmjeravanje talentiranih učenika ka putevima utemeljenim na znanju primio je Dino Ćorović, profesor fizike u našoj školi. Ovo je druga godina zaredom da se među najboljim srednjoškolcima iz Tuzlanskog kantona nađu dva učenika Behram-begove medrese. Organizator ovog događaja je Federalno ministarstvo obrazovanja i nauke

## Amerikanka Lindsay Bryda podučava učenike Medrese engleskom jeziku

U ovoj školskoj godini u našoj školi boravi Lindsay Bryda iz Sjedinjenih Američkih Država. Ona radi kao asistent u nastavi engleskog jezika s učenicima na redovnoj nastavi, s polaznicima English-Cluba, Book-Cluba, Conversation-Cluba, s polaznicima Access-programa i s profesorima naše škole. Završila je političke nauke u Sjedinjenim Američkim Državama i u našoj školi radi kao Fulbright English Teaching Assistant. U našoj zemlji će boraviti sve do juna 2020. godine. Behram-begova medresa je njen domaćin, a istovremeno radi i u Američkom kutku u biblioteci "Derviš Sušić" u Tuzli, surađuje s Filozofskim fakultetom u Tuzli i s Pedagoškim zavodom Tuzlanskog kantona. Ovaj program je podržan od Vlade Sjedinjenih Američkih Država.

## Na večeri duhovne muzike u Gunji

U petak, 13. 12. 2019. godine hor Behram-begove medrese je nastupio na 3. večeri duhovne muzike u Gunji, u Hrvatskoj. Oni su se odazvali pozivu organizatora i glavnog imama Medžlisa Islamske zajednice Gunja Idris-ef. Bešića. U programu večeri učestvovali su i učenici Osnovne škole iz Gunje, kao i predstavnici pravoslavne i katoličke zajednice iz Gunje i okolnih mjesta. Džamija u Gunji je prva sagrađena džamija na prostoru Hrvatske nakon Drugog svjetskog rata. Sve do otvorenja džamije u Zagrebu ova džamija je bila jedina koja je postojala u Hrvatskoj

## Behram-begova medresa prva na vrednovanju srednjih škola Tuzlanskog kantona

I ove godine je izvršeno vrednovanje srednjih škola na području Tuzlanskog kantona. Pedagoški zavod Tuzlanskog kantona je na svojoj zvaničnoj web stranici (pztz.ba) u kategoriji srednjeg obrazovanja, potkategoriji vrednovanje škola, objavio rezultate vrednovanja srednjih škola na području Tuzlanskog kantona za školsku 2018/19. godinu. U rangu svih srednjih škola Behram-begova medresa u Tuzli zauzela je prvo mjesto, sa ukupno ostvarenih 6.804 boda. Na drugom mjestu nalazi se Mješovita srednja škola iz Živinica, s osvojenih 4.928,20 bodova, a trećeplasirana je Mješovita srednja škola iz Gračanice, s osvojenih 4.750 bodova. Vrednovanje svih

srednjih škola na području Tuzlanskog kantona vršili su zaposlenici Pedagoškog zavoda Tuzlanskog kantona po instrumentariju Zavoda

### Zimski seminar za profesore Medrese

Seminar je održan u četvrtak, 9. januara 2020. godine u našoj školi. Predavači su bili stručnjaci iz svojih oblasti. Na temu "Sufizam u poeziji na perzijskom jeziku" govorio je dr. Munir Drkić sa Katedre za perzijski jezik i književnost Filozofskog fakulteta u Sarajevu. Direktor Uprave za obrazovanje i nauku Rijaseta Islamske zajednice u Bosni i Hercegovini dr. Dževad Hodžić govorio je o "Krizi obrazovanja u znanstvenom i tehnološkom dobu", a o temi "Nastavno-odgojni proces između teorije i praktičnih izazova" govorio je dr. Nezir Halilović, šef Odjela za vjeronauku u Upravi za obrazovanje i nauku Rijaseta Islamske zajednice u Bosni i Hercegovini. Seminaru je u jednom dijelu prisustvovao i muftija tuzlanski Vahid-ef. Fazlović, koji se u svom obraćanju osvrnuo na rezultate nedavnog vrednovanja srednjih škola na području Tuzlanskog kantona, na kojem je naša škola zauzela prvo mjesto. Ovo druženje je nastavak dugogodišnje tradicije održavanja seminara za profesora Behram-begove medrese u toku zimskog raspusta.

### Medresini volonteri u Odžaku

Volonteri Behram-begove medrese su u utorak, 28. 1. 2020. godine posjetili mekteb za cjelodnevni boravak Medžlisa Islamske zajednice Odžak. Sredstvima koja su prikupili prodajom kolača na Dan volontera 5. 12. 2019. godine kupili su aparat LED TV i poklonili ga ovom mektebu. Domaćini su istakli da će im to obogatiti sadržaje i rad s djecom. Ovo je bila prilika da učenici upoznaju rad drugih ustanova izvan Tuzle i da se druže s polaznicima mekteba. Glavni imam Medžlisa Islamske zajednice Odžak Fahrudin-ef. Mujanović obratio se gostima i naglasio da ovo nije prva posjeta učenika Behram-begove medrese Odžaku. Za goste je pripremljena i radionica "List lijepih riječi".

### Promovirana knjiga **Radosne bilješke**

U amfiteatru naše škole u utorak, 11. 2. 2020. godine promovirana je knjiga *Radosne bilješke, vježbe za sretno srce*, autorice Tamare

Gray. O knjizi su govorile profesorica bosanskog jezika i književnosti Meliha Terzić, profesorica fikha u Behram-begovoj medresi Azra Fazlović i urednica časopisa *Bosanska Sumeja* Azra Hasanović. Moderator je bila Amina Đulović. Knjiga se sastoji od pedeset i dva sedmična eseja koji vode čitaoca kroz godinu dana, ispunjenu godišnjim dobima, periodima, blagodatima i radosnim duhovnim rastom. Knjiga *Radosne bilješke* doživjela je nekoliko promocija u našoj zemlji, a sada još jednu i u Tuzli. Knjigu je s engleskog jezika prevela Azra Hasanović.

### Edukacijom do najboljeg biznis-plana

U četvrtak, 13. februara tekuće godine održana je edukacija na sekciji Liderstvo i poduzetništvo. Edukaciju je održao Valdet Peštalić, trener konsultant u oblasti poduzetništva. Prisustvovalo je deset članova sekcije, koji će imati priliku da na poziv Forreruner Federation iz Sjedinjenih Američkih Država predstave najbolji biznis-plan. Takmičenje će biti održano na konferenciji škola koje učestvuju u projektu Liderstva i poduzetništva, a koji se realizuje kroz sekcije u dvanaest škola u Bosni i Hercegovini.

### Priznanja najboljim školama

U ponedjeljak, 17. februara 2020. godine u Pedagoškom zavodu Tuzlanskog kantona uručena su priznanja osnovnim i srednjim školama koje su u školskoj 2018/2019. godini ostvarile najbolje rezultate. Naša škola je na vrednovanju za 2018/2019. godine osvojila prvo mjesto u rangu srednjih škola na području Tuzlanskog kantona i dodijeljeno joj je priznanje. Primio ga je pomoćnik direktora za nastavu u našoj školi Mensur Husić. Priznanje je uručio direktor Pedagoškog zavoda Tuzlanskog kantona Nikola Čiča. Na vrednovanju rada škola za prošlu školsku godinu, drugo mjesto je zauzela Mješovita srednja škola Živinice, a na trećem mjestu je Mješovita srednja škola iz Gračanice.

### Predsjednik Mešihata primio učenike Tuzlanske medrese

U večernjim satima, 17. 2. 2020. godine predsjednik Mešihata IZ u Srbiji muftija dr. Mevlud ef. Dudić sa saradnicima je primio grupu

od deset učenika i učenica Behram-begove medrese iz Tuzle i njihovog odgajatelja prof. Bekira Šabića, koji u okviru programa razmjene učenika borave u Gazi Isa-begovoj medresi u Novom Pazaru. Muftija Dudić je goste upoznao sa historijatom Novopazarske medrese i razvojnim putem Islamske zajednice na ovim prostorima, istakavši da su medrese najveće bogatstvo Islamske zajednice te da je medresa u Novom Pazaru ponos Mešihata, a da je od izuzetnog značaja razmjena učenika između ove dvije medrese koje od samog početka imaju posebno dobru saradnju. Profesor Šabić je govorio o ciljevima razmjene učenika, naglasivši da istovremeno i u Tuzlanskoj medresi boravi grupa od deset učenika i učenica Medrese "Gazi Isa-beg".

Inače, ovo je prva razmjena učenika medresa koju je organizirala Uprava za obrazovanje i nauku Rijaseta IZ u Bosni i Hercegovini. Medresanti iz Tuzle, osim posjete Mešihatu, tokom ovog perioda su obišli i odgojno-obrazovne ustanove Islamske zajednice, značajnosti Novog Pazara, te organizirali jednodnevni izlet van grada.

### Učenici Medrese u akciji darivanja krvi

I ove školske godine učenici naše škole su se odazvali akciji dobrovoljnog darivanja krvi. U srijedu, 19. 2. 2020. godine na Univerzitetском kliničkom centru Tuzla, Odjelu transfuziologije, bilo je 87 naših učenika. Prethodno su bili upoznati s važnošću darivanja krvi i ko sve može biti davatelj. Ovo je akcija koja se u dogovoru s UKC-om Tuzla uspješno provodi još od prvih poslijeratnih godina.

### Učenici medrese iz Novog Pazara u Tuzli

Program "Partnerstvo medresa" naša škola je realizirala s Medresom "Gazi Isa-beg" iz Novog Pazara. Ugostili smo grupu od pet učenika i učenica iz ove medrese, koji su u našoj školi boravili u periodu od 16. 2. do 21. 2. 2020. godine. U ovom periodu učenici su prije podne prisustvovali redovnoj nastavi, a u poslijepodnevним satima realizirani su edukativni sadržaji i izleti. U ponedjeljak su obišli znamenitosti grada Tuzle, a u srijedu su posjetili Bijeljina. U ovom gradu dobrodošlicu im je priredio glavni imam Mežlisa Islamske zajednice Bijeljina Samir Camić. Gosti iz Sandžaka su posjetili Mektepski centar i Atik džamiju, a poslije su se družili s polaznicima centra. Članovi hora Behram-begove medrese i Recitatorske sekcije izveli su i program. Profesor bosanskog jezika i književnosti

Ali Hasanović održao je predavanje o bogatoj prošlosti bosanskog jezika, te nas podsjetio na najznačajnije pisce iz naše višestoljetne povijesti. U četvrtak su boravili u Posavini, u posjeti Gradačcu i Bosanskom Šamcu. U gradu Zmaja od Bosne posjetili su kulu Gradašćevića, oklopni voz i šehidsko mezarje. U Bosanskom Šamcu su boravili u rodnoj kući predsjednika Republike Bosne i Hercegovine Alije Izetbegovića. U istom ovom periodu grupa učenika i učenica naše škole boravila je u medresi "Gazi Isa-beg" u Novom Pazaru.

### Osnovnoškolci u posjeti Behram-begovoj medresi

Našu školu su u četvrtak, 26. 2. 2020. godine posjetili učenici iz osnovnih škola "Miladije" i "Tušanj", u pratnji svojih vjeroučitelja, profesorica Šejle Dorić, Almase Šestan i vjeroučitelja Saudina Dedića. Za učenike je pripremljen i kraći program, koji je izveo hor Behram-begove medrese i članovi Sekcije znakovnog jezika, a gosti su nakon toga pogledali promotivni film o našoj školi. Obišli su kabinete hemije, biologije i fizike, a za njih su naši nagrađivani učenici izveli nekoliko eksperimenata, kako bi im približili ove izuzetno zanimljive znanosti. Nakon toga su obišli kompleks Behram-begove medrese. Na kraju svoje posjete imali su priliku prisustvovati premijernoj izvedbi drame *Bašeskija, san o Sarajevu*, koju su izveli maturanti, a čiju režiju potpisuje Emina Hatunić, profesorica bosanskog jezika u našoj školi.

### Nastava u Medresi na Google Classroomu

Redovno odvijanje nastave u Behram-begovoj medresi je prekinuto, kao i u svim drugim školama na području Tuzlanskog kantona, u četvrtak, 12. marta ove godine. No, već taj dan su poduzeti prvi koraci na prevazilaženju te vanredne situacije. U e-dnevniku, koji je u funkciji već nekoliko godina, odmah su postavljene lekcije koje su bile na redu za obradu, kao i upute učenicima kako da se ponašaju i što da pripremaju od gradiva. Vikend je iskorišten za pripreme za izvođenje online-nastave. Ogroman posao na pripremanju platforme Google Classroom obavio je profesor informatike u Medresi Elvedin Kozarević. Za korištenje ove platforme Medresa je prije domenski registrirana tako da je nastava startala već u ponedjeljak, 16. 3. 2020. godine. Učenici su se vrlo brzo navikli i nema problema

s njihovim učešćem u realizaciji. Ovakav vid nastave će se odvijati sve dok to okolnosti budu nalagale.

### Čestitka maturantima 344. generacije

Direktor Behram-begove medrese u Tuzli Ahmed Hatunić i muftija tuzlanski Vahid-ef. Fazlović uputili su zajedničku čestitku maturantima ove škole, njihovim roditeljima i članovima porodica, a povodom okončanja njihovog školovanja.

U čestitki stoji:

"Dragi maturanti, dragi roditelji i porodice maturanata!

U ime Muftijstva tuzlanskog i Behram-begove medrese u Tuzli, iskreno vam čestitamo završetak vašeg srednjoškolskog obrazovanja. Taj tako važan događaj u vašim životima kruna je velikog truda, rada i odricanja koje ste uložili u posljednje četiri godine, a članovi porodica ljubav, strpljenje i veliku brigu. Vaša radost je velika i ne mogu je pomutiti okolnosti u kojima se našao čitav svijet. Vjerujemo da ćete vedra čela i radosna srca smjelo kročiti u nove životne izazove. Nadamo se da ste u Behram-begovoj medresi učvrstili temelje svoje vjere, stekli dobro obrazovanje i odgoj i težnju za stalnim usavršavanjem svojih znanja i vještina. Ponosni smo na vas i s puno nade vas ovih dana ispraćamo, s dobrim uvjerenjem da ćete u skoror budućnosti biti aktivni i korisni sudionici našeg društva. Vama, poštovani roditelji i članovi porodica, želimo da vam vaša djeca prirede još puno radosnih trenutaka."

### Literarni konkurs povodom Dana porodičnih vrijednosti

Behram-begova medresa u Tuzli je povodom Dana porodičnih vrijednosti raspisala literarni konkurs za učenike osnovnih i srednjih škola. Iako je virus COVID-19 izazvao pometnju svugdje, pa i u školama, na konkurs se javio dovoljan broj kandidata u obje kategorije, pa je žiri ocijenio sve pristigle radove. U kategoriji učenika osnovnih škola najbolje radove na temu "Dom je tamo gdje neko primijeti da te nema" napisali su:

- Amna Imamović, OŠ „Kalesija“, 1. mjesto;
- Ahmed Halilbašić, „Prva osnovna škola“ Živinice, 2. mjesto;



- Medina Osmanhodžić, OŠ „Hasan Kikić“ Gračanica, 3. mjesto.

Najbolje radove u kategoriji učenika srednjih škola, koji su pisali na temu "Oluje čine da drveće ima dublji korijen", napisali su:

- Azra Imamović, Mješovita srednja škola Živinice, 1. mjesto;
- Aida Mehanović, Mješovita srednja škola Kalesija, 2. mjesto;
- Amina Vejzović, Mješovita srednja škola Čelić, 3. mjesto.

Ovim učenicima su uručene predviđene nagrade.

### Upis u Medresu bez polaganja prijemnog ispita

Na sjednici Rijaseta Islamske zajednice u Bosni i Hercegovini, koja je održana online 23. aprila ove godine, usvojene su izmjene i dopune pravilnika o upisu učenika u prvi razred u medresama Islamske zajednice u BiH. Prema usvojenim izmjenama, osnivač medresa u Bosni i Hercegovini i u Sandžaku omogućio je kandidatima za upis i njihovim porodicama da se ne izlažu riziku zaraze od COVID-19, čija je pandemija usporila ili zaustavila mnoge aktivnosti i procese u čitavom svijetu, pa i one u obrazovanju. Ovim izmjenama je omogućeno medresama da organiziraju online-upis kandidata i provođenje pojednostavljene procedure prijema aplikacija i bodovanja kandidata. Objavljen je konkurs za upis učenika, nakon čega je svim kandidatima bila dostupna odgovarajuća aplikacija za upis.

### Prva bosanska kurra hafiza profesorica Zubejda Gobeljić

U utorak, 12. 5. 2020. godine profesorica odgoja u našoj Medresi hafiza Zubejda Gobeljić okončala je šestogodišnje educiranje iz svih kiraeta. Time je prva u Bosni i Hercegovini stekla zvanje kurra hafize. Svoj posljednji ispit je požila pred najeminentnijim stručnjakom kiraetske nauke kod nas kurra hafizom Dževadom Šošićem. Od jeseni 2014. godine hafiza Gobeljić je radila na učenju svih rivajeta i kiraeta pojedinačno, a zatim i učenja hatme po svih sedam kiraeta i njihovih 14 rivajeta prema poznatoj metodi džemaa. Sticanjem ovog zvanja hafiza Gobeljić svrstala se među one koji su svoje idžaze uzeli od eminentnih autoriteta kiraetske nauke, veoma cijenjenog i poznatog predajnog puta do Poslanika, a.s., uz učenje svakog kiraeta prema općeprihvaćenim uslovima i metodama koje su uspostavili

autoriteti ove naučne oblasti. Hafiza Zubejda Gobeljić je postala hafiza časnog Kur'ana u ramazanu 2007. godine.

### Završena nastavna 2019/20. godina

U srijedu, 17. juna 2020. godine završena je nastava u Behram-begovoj medresi za učenike prvog, drugog i trećeg razreda. Nastava je uspješno privedena kraju uprkos trenutnoj situaciji uzrokovanoj korona virusom. Učenici su pokazali visok stepen odgovornosti i na vrijeme su se prilagodili trenutnoj situaciji i odgovarali na zadatke koje su morali realizovati. Zahvaljujući profesoru informatike u našoj školi Elvedinu Kozareviću na vrijeme se pristupilo uvođenju online-nastave, tako da je i nastavna godina završena u predviđenom roku. Povratak u školske klupe je planiran 1. septembra 2020. godine.

### Najnastavnik građanskog obrazovanja

Profesor Ahmed Omerović je dobitnik priznanja Najnastavnik za školsku 2019/20. godinu. On je nagradu dobio zbog posebnog doprinosa u realizaciji online-nastave, kao i doprinosa u kreiranju edukativnih sadržaja CIVITAS e-platforme za školske programe tog predmeta. Dobitnici priznanja izvrsnosti Najnastavnik u realizaciji predmetne nastave građanskog obrazovanja u srednjim školama je još petero profesora iz Bosne i Hercegovine koji su se istakli u realizaciji i kreiranju edukativnih sadržaja. Profesor Ahmed Omerović predaje Demokratiju i ljudska prava u Behram-begovoj medresi, a u junu 2017. godine također je dobio priznanje Najnastavnik.